

Kadar pengangguran rakyat Malaysia menurun

PETALING JAYA – Kadar pengangguran rakyat Malaysia menurun sebanyak 0.3 peratus iaitu daripada 5.1 peratus pada suku kedua 2020 kepada 4.8 peratus bagi tempoh sama tahun ini.

Menteri Sumber Manusia, Datuk Seri M. Saravanan berkata, berdasarkan data Jabatan Perangkaan Malaysia, di peringkat negeri pula, Wilayah Persekutuan Labuan dan Sabah mencatatkan kadar pengangguran lebih 8 peratus iaitu masing-masing pada kadar 8.8 peratus dan 8.7 peratus.

Katanya, ia bermakna daripada 100 orang tenaga buruh di negeri tersebut, sembilan orang daripadanya adalah penganggur.

“Bagi tempoh yang sama, Perlis mencatatkan kadar pengangguran 5.3 peratus manakala enam negeri mencatatkan kadar pengangguran lebih daripada 4.0 peratus iaitu Kelantan (4.8 peratus); Kuala Lumpur (4.7 peratus); Perak, Selangor dan Sarawak (4.4 peratus) serta Terengganu (4.2 peratus).

“Enam negeri iaitu Kedah, Pulau Pinang, Johor, Melaka dan Negeri Sembilan mencatatkan antara 3.5 peratus ke 3.9 peratus manakala kadar pengangguran terendah di Wilayah Persekutuan Putrajaya pada kadar 1.7 peratus,” katanya di Dewan Rakyat hari ini.

Beliau berkata demikian bagi menjawab soalan Datuk Ahmad Jazlan Yaakub (UMNO-Machang) yang ingin tahu kadar pengangguran rakyat Malaysia mengikut negeri sehingga Ogos tahun ini.

– K! ONLINE

<https://www.kosmo.com.my/2021/09/14/kadar-pengangguran-rakyat-malaysia-menurun/>